



**Sud Bosne i Hercegovine
Суд Босне и Херцеговине**

**Broj: S1 3 P 037076 20 Iž
Sarajevo, 07.10.2020. godine**

Sud Bosne i Hercegovine, u drugostepenom vijeću sastavljenom od sudija Dinke Bešlagić Čovrk kao predsjednika vijeća, Vesne Trifunović i Srete Crnjaka kao članova vijeća, odlučujući o žalbi Tanje Zagorščak sa boravkom u Republici Hrvatskoj 32270 Županja ul prof Ivana Baotića broj 1 koja osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasnje izvan BiH za Lokalne izbore 2020. godine, u nejavnoj sjednici, održanoj dana 07.10.2020. godine, donio je

R J E Š E N J E

Žalba se odbija.

O b r a z l o Ź e n j e

Centralna izborna komisija Bosne i Hercegovine je Odlukom broj i datum navedeni u uvodu odbila upis u izvod iz Centralnog biračkog spiska za glasnja izvan BiH za Lokalne izbore 2020. godine po podnesenim prijavama do 01.09.20.20.godine jer nisu ispunjeni uslovi propisani članom 3.15. stav 1, 2 i 3 Izbornog zakona BiH.

Navedenom odlukom odbijena je prijava Tanje Zagoreščak koja je blagovremeno izjavila žalbu u kojoj ističe da nema saznanja kako je došlo do njene registracije na više adresa, te je zahtjevala da se glasački materijal pošalje na adresu iz prijave ili omogući glasanje u opštini Pelagićevo.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer je žalitelj dostavio dvije prijave za glasanje izvan BiH u kojima su navedene različite adrese na koje treba da bude upućen glasački materijal. Druga prijava se ne može smatrati obavjesti o promjeni podataka u smislu člana 3.16 Izbornog zakona jer ne ukazuje na saznanja o podnesenoj prvoj prijavi i da predstavlja promjenu podataka iz prve prijave. Kako nije bilo moguće utvrditi koja od podnesenih prijava je vjerodostojna, te kako žalitelj ni uz žalbu nije dostavio dokaze da je adresa na kojoj traži da dostavu glasačkog materijala i adresa njegovog boravišta, zaključeno je da se radi o zloupotrebi biračkog prava.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluke Centralne izborne komisije BiH kojom je odbijena prijava Tanje Zagorščak za upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine.

Iz predmeta spisa utvrđeno je da je žaliteljica dana 03.08.2020. godine na propisanom obrascu, elektronskim putem, podnijela prijavu za glasanje izvan BiH u kojoj je navela da se glasački materijal uputi na adresu Republici Hrvatskoj 32270 Županja ulica prof Ivana Baotića br.1

Nadalje, utvrđeno je da je dana 05.08.2020. godine, takođe elektronskim putem podnesena druga prijava žaliteljice za glasanje izvan BiH u kojoj je navedeno da se glasački materijal ima dostaviti na drugu adresu u Republici Hrvatskoj 23420 Benkovac ulica Tina Ujevića br. 53

Proizilazi da je žaliteljica podnijela dvije nezavisne prijave za glasanje izvan BiH i da je Centralna izborna komisija BiH pravilno zaključila da se druga prijava ne može smatrati promjenom podataka iz prve prijave o adresi na koju se ima dostaviti glasački materijal.

Usljed nedostatka bilo kakvog dokaza koji potvrđuje da žaliteljica ima prebivalište van BiH, Centralna izborna komisija BiH nije mogla utvrditi koja od podnesenih prijava je vjerodostojna, niti ova činjenica proizilazi iz žalbe. U ovim okolnostima nedostaju relevantni podaci na osnovu kojih se može ispitati ispunjavanje zakonskih uslova za ostvarivanje biračkog prava državljanina BiH, a za koje je, shodno članu 3.15 stav 7 Izbornog zakona BiH, odgovoran podnosilac prijave. Predmetnom odlukom žaliteljici nije uskraćeno biračko pravo jer se, shodno odredbi člana 3.16 stav 2 citiranog zakona, nalazi u izvodu iz Centralnog biračkog spiska za glasanje u osnovnoj izbornoj jedinici u kojoj ima prebivalište u Bosni i Hercegovini.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
SUDIJA
Dinke Bešliagić Čovrk